

Plaza Juan Pablo Duarte lo ser inaugura dia 14 di juli venidero

ORANJESTAD - Consul di Republica Dominicana na Aruba, Joseline Rosario de Rosa ta masha satisfecho cu e trabou di construccion di e monumento na honor di Juan Pablo Duarte ta biniendo cla.

E diplomatico a declara cu actualmente e trabou di construccion di e monumento aki ta den e fase di e detayenan gewoon. Igualmente el a informa cu nan tin un fecha tentativo pa inaugura e obra aki riba dia 14 di juli venidero. E lo bira un acto protocolario di inauguracion di e plaza Juan Pablo Duarte, dilanti di hospital bieu.

"E lo bira e plaza Juan Pablo Duarte, e tata di e nacion Dominicano", asina el a declara.

E diplomatico a bisa cu e fecha di 14 di juli no ta un fecha special of conmemorativo den e calendario oficial di celebracion na Republica Dominicana. Sinembargo nan a dicidi di

realisa e inauguracion di e obra aki riba e fecha tentativo aki, ya cu dia 16 di augustus lo tuma luga e acto di instalacion di e gobierno nobo di e presidente electo Danilo Medina.

"Pues pa evita cu e acto aki no lo wordo bruha cu e celebracionnan oficial, nos a dicidi di realisa e inauguracion di e plaza Juan Pablo Duarte prome cu dia 16 di augustus", segun e Consul Dominicano.

Aunke dia 14 di juli no ta un fecha conmemorativo -segun Consul Dominicano- e lo bira si un fecha conmemorativo pasobra nan lo inaugura e plaza aki dedica na e Tata di e Nacion Dominicano.

"Esaki ta e plaza cu e comunidad Dominicano tabata spera pa basta tempo caba. Y e lo bira e plaza caminda e Dominicanonan lo rindi honor na e tata fundado di e nacion Dominicano", asina el a laga sa. □



E trabou di construccion di e monumento na honor di Juan Pablo Duarte ta biniendo cla caba, y lo ser inaugura entrante otro luna.